

VENDIM
Nr.121, datë 25.2.2005

PËR DISA SHTESA DHE NDRYSHIME NË VENDIMIN NR.540, DATË 21.12.1992 TË KËSHILLIT TË MINISTRAVE “PËR KRIJIMIN E KËSHILLAVE TË KULTURËS DHE SHPËRBLIMIN E TYRE”, TË NDRYSHUAR

Në mbështetje të nenit 100 të Kushtetutës dhe të neneve 124 e 128 të ligjit nr.8445, datë 12.5.1999 “Kodi i Procedurave Administrative të Republikës së Shqipërisë”, me propozimin e Ministrit të Kulturës, Rinisë dhe Sporteve, Këshilli i Ministrave

VENDOSI:

Në vendimin nr.450, datë 21.12.1992 të Këshillit të Ministrave, të ndryshuar, të bëhen këto shtesa dhe ndryshime:

1. Titulli i vendimit ndryshohet si më poshtë vijon:

“PËR KRIJIMIN E KËSHILLAVE ARTISTIKO-KULTURORE DHE PËR SHPËRBLIMIN E ANËTARËVE TË TYRE”.

2. Pika 1 ndryshohet si më poshtë vijon:

“1. Krijimin e këshillave artistiko-kulturore, pranë Ministrit të Kulturës, Rinisë dhe Sporteve, institucioneve qendrore kulturore, artistike dhe atyre të trashëgimisë kulturore, si dhe pranë bashkive a komunave, me karakter këshillimor, me mandat 2–vjeçar.

Përbërja e këshillit artistiko-kulturor pranë Ministrit të Kulturës, Rinisë dhe Sporteve caktohet me urdhër të tij.

Përbërja e këshillit artistiko-kulturor pranë institucioneve qendrore me karakter artistik, kulturor dhe të trashëgimisë kulturore miratohet nga Ministri i Kulturës, Rinisë dhe Sporteve, sipas propozimit të titullarëve të këtyre institucioneve.

Përbërja e këshillit artistiko-kulturor në bashki a komunë miratohet nga këshilli i bashkisë a komunës përkatëse.

Funksionimi i këtyre këshillave bëhet në përputhje me rregulloren e miratuar nga Ministri i Kulturës, Rinisë dhe Sporteve, me propozimin e vetë këshillit.

Pranë institucioneve të përmendura më sipër krijohen edhe këshilla të përkohshme artistiko-kulturore, të cilat funksionojnë si juri apo komisione të vlerësimit të veprave të artit.”.

3. Pika 2 ndryshohet si më poshtë vijon:

“2. Këshillat artistiko-kulturore të kenë në përbërje personalitete të shquara në fushën e artit, të kulturës dhe të shkencës, të cilët nuk duhet të jenë të punësuar në institucionet pranë të cilave janë ngritur këto këshilla.”.

4. Pika 3 ndryshohet si më poshtë vijon:

“3. Këshillat artistiko-kulturore propozojnë dhe japin mendime për hartimin dhe zbatimin e politikave kulturore e artistike të institucioneve pranë të cilave funksionojnë, për mbështetjen e talentëve të reja dhe vlerësimin e cilësisë artistike etj.

Për probleme të veçanta, me karakter profesional, si dhe për kalendarin vjetor të veprimtarive, që do të zhvillohen nga institucionet, këshillat artistiko-kulturore kanë të drejtë vendimmarrëse.

Për kalendarin vjetor të veprimtarive njoftohet Ministri i Kulturës, Rinisë dhe Sporteve për institucionet qendrore në varësi të tij, kryetari i bashkisë për bashkinë dhe kryetari i komunës për komunën, sipas propozimeve të këshillave artistiko-kulturore.”.

5. Pika 4 ndryshohet si më poshtë vijon:

“4. Anëtarët e këshillave artistiko-kulturore, pranë Ministrit të Kulturës, Rinisë dhe Sporteve dhe institucioneve qendrore kulturore, artistike dhe atyre të trashëgimisë kulturore, të shpërblehen, në masën 4 500 (katër mijë e pesëqind) lekë, çdo muaj kur zhvillojnë mbledhje, ndërsa anëtarët e këshillave në bashki a komunë, të shpërblehen sipas vendimit të këshillit të bashkisë a komunës, por jo më tepër se 4 500 (katër mijë e pesëqind) lekë, çdo muaj kur zhvillojnë mbledhje.

Të drejtën e shpërblimit e përfitojnë edhe personat, që aktivizohen në këshilla të përkohshme artistiko-kulturore, si juri a komisione të vlerësimit të veprave të artit. Këta persona shpërblehen në masën 5 000 (pesë mijë) lekë, çdo muaj kur zhvillojnë mbledhje.

Efektet financiare, për shpërblimin e anëtarëve të këshillave artistiko-kulturore, të përballohen nga të ardhurat që krijon vetë institucioni.”.

6. Pas pikës 5, shtohet pika 6, me këtë përmbajtje:

“6. Ngarkohet Ministri i Kulturës, Rinisë dhe Sporteve, që brenda 1 muaji nga hyrja në fuqi e këtij vendimi, të nxjerrë udhëzimin përkatës për mënyrën e organizimit dhe të funksionimit të këshillave artistiko-kulturore.”.

Ky vendim hyn në fuqi pas botimit në Fletoren Zyrtare.

KRYEMINISTRI
Fatos Nano